

### ԱՅՑԵԼՈՒԹՅՈՒՆ ՀԱՅ ՆԱՀԱՏԱԿԱՑ ՀՈՒՇԱՐՁԱՆ

Սեպտեմբերի 21-ին, կիրակի օրը, ժամը 17-ին, պատգամավորությունը հանդիսավորապես այցելեց Ծիծեռնակաբերդում հայ մահատակաց հուշարձան և ծաղիկներ դրեց: Ապա պատվիրակության անդամները առանձին-առանձին խմբերով իրենց մայրենի լեզվով հոգեհանգստյան մասնավոր կարգ կատարեցին հայ բյուրավոր մահատակների հոգիների խաղաղության համար:

Երեկոյան ժամը 19.30-ին պատվիրակությունը Սպենդիարյանի անվան օպերայի և բալետի պետական թատրոնում ներկա եղավ Արմեն Տիգրանյանի «Անուշ» օպերայի ներկայացմանը:

### ԱՅՑԵԼՈՒԹՅՈՒՆՆԵՐ ԵՎ ՄԵԿՆՈՒՄ

Սեպտեմբերի 22-ին և 23-ին, երկուշաբթի և երեքշաբթի օրերին, պատվիրակության անդամները այցելեցին Մայր տաճարի թանգարան, Վաղարշապատի պատմական վանքերը, եղան Գառնիում, ս. Գեղարդ վանքում, այցելեցին Էրեբունի թանգարան և պետական պատկերասրահ, եղան Բյուրականի հայրապետական ամառանոցում և մայրաքաղաքի այլ տեսարժան վայրերում:

Սեպտեմբերի 23-ին, երեքշաբթի օրը, պատվիրակության բոլոր անդամները հրաժեշտ տվեցին Մայր Աթոռին լավագույն և անմոռանալի տպավորություններով:

Սուրբ Էջմիածնում համաօրոթոդքս սույն խորհրդակցության գումարման առթիվ Մայր Աթոռի դիվանի կողմից հայ մամուլին տրվեց հետևյալ հաղորդագրությունը.

ՊԱՐԳԵՎ ԾԱՀԱԶՁԱՆ

### Հ Ա Ղ Ո Ր Դ Ա Գ Ր Ո Ւ Թ Յ Ո Ւ Ն

Եկեղեցիների համաշխարհային խորհրդի «Համաշխարհային առաքելություն և ավետարանչություն» հանձնաժողովի նախաձեռնությամբ և Նորին Սրբություն Ս. Տ. Վազգեն Ա Ամենայն Հայոց կաթողիկոսի հրավերով սույն թվականի սեպտեմբերի 16—21-ը Մայր Աթոռ ս. Էջմիածնում գումարվեց համաօրոթոդքս խորհրդակցություն:

Խորհրդակցությանը մասնակցում էին Կ. Պոլսի Տիեզերական պատրիարքության, Ռուսաստանի, Վրաստանի, Ռումինիայի, Բուլղարիայի, Սերբիայի, Չեխոսլովակիայի, Լեհաստանի, Ֆինլանդիայի, Կիպրոսի, Հնդկաստանի, Հունաստանի, Եթովպիայի և ԱՄՆ-ի օրոթոդքս եկեղեցիների ներկայացուցիչները:

Ժողովին մասնակցում էր նաև Հայաստանյայց առաքելական եկեղեցու պատվիրակությունը:

Համաօրոթոդքս սույն խորհրդակցությանը մասնակցում էին 33 ներկայացուցիչներ, այդ թվում նաև Եկեղեցիների համաշխարհային խորհրդի ժնկի կենտրոնի ղեկավար անձնակազմի անդամներ և խորհրդականներ:

Խորհրդակցության գլխավոր թեման էր՝ «Խոստովանել Քրիստոսին այսօր եկեղեցու ծիսական կյանքի միջոցով»:

Սեպտեմբերի 17-ին, չորեքշաբթի օրը, առավոտյան ժամը 9.30-ին,

սկսվեց խորհրդակցությունը Մայր տաճարում կատարված էկումենիկ աղոթքով:

Ժամը 10-ին բոլոր պատգամավորները Վեհաբանում ընդունվեցին Հայոց Հայրապետի կողմից: Նորին Սրբությունը ողջունեց հյուրերի ներկայությունը հայ ժողովրդի հոգևոր կենտրոնն ու Էջմիածնում, շեշտեց Մայր Աթոռում գումարվող սույն խորհրդակցության կարևորությունը ԵՀԽ-ի առաջիկա 5-րդ համագումարի նախապատրաստության կապակցությամբ:

Հանուն պատգամավորության Հայոց Հայրապետին ողջված շնորհակալական ջերմ խոսք ասաց ԵՀԽ-ի «Համաշխարհային առաքելություն և ավետարանչություն» հանձնաժողովի տնօրեն դոկտ. Էմիլիո Կաստրոն:

Ժամը 10.30-ին Վեհաբանի հանդիսության դահլիճում Հայոց Հայրապետի աղոթքով տեղի ունեցավ պաշտոնական բացումը համաօրթոդոքս սույն խորհրդակցության: Ապա ժողովը անցավ օրակարգում դրված հարցերի քննարկմանը:

Խորհրդակցությանը նախագահում էր հայ եկեղեցու ներկայացուցիչ տ. Ծաֆն արքեպիսկոպոս Աճեմյանը, որը հանդես եկավ «Խոստովանել Քրիստոսին այսօր եկեղեցու ծիսական կյանքի միջոցով» գլխավոր թեմային նվիրված ֆրանսերեն լեզվով ընդարձակ զեկուցումով:

Խորհրդակցության ընթացքում ընթերցվեցին նաև հետևյալ զեկուցումները.

ա. Աստուծո խոսքի քարոզությունը պաշտամունքի միջոցով.

բ. Ծիսական ոգեկանությունն այսօր.

գ. Ծիսական կյանքի ոգեկան հիմքը:

Սույն զեկուցումները այնուհետև հանգամանորեն քննարկվեցին աշխատանքային երեք խմբերում:

Սեպտեմբերի 20-ին, շաբաթ օրը, տ. Ծաֆն արքեպիսկոպոսի նախագահությամբ գումարվեց խորհրդակցության եզրափակիչ լիագումար նիստը, որ քննության առնվեցին աշխատանքային խմբերի կողմից պատրաստված բանաձևերը և ընդունվեցին համապատասխան փաստաթղթեր՝ ներկայացվելու համար Նալբանդում սույն թվականի նոյեմբերին գումարվելիք ԵՀԽ-ի 5-րդ համագումարին:

Նույն օրը, ժամը 14-ին, պատգամավորությունը ներկայացավ Ամենայն Հայոց Հայրապետին և հանձնեց Նրան խորհրդակցությունում ընդունված փաստաթղթերը: Այս առթիվ, հանուն ժողովականների, դոկտ. Էմիլիո Կաստրոն շնորհակալություն հայտնեց Հայոց Հայրապետին՝ ցույց տրված սրտաբաց և ջերմ ընդունելության համար:

Հայոց Հայրապետն Իր ուրախությունն ու գոհունակությունը հայտնեց խորհրդակցության բարեհաջող ավարտի առթիվ՝ շեշտելով քննարկված գլխավոր թեմայի կարևորությունը ծիսական արարողությունների միջոցով Քրիստոսի Ավետարանի վկայությունը բերելու մեր օրերի մարդկությանը:

Սեպտեմբերի 21-ին պատգամավորությունը Մայր տաճարում ներկա եղավ ս. պատարագի արարողությանը: Այստեղ Հայոց Հայրապետը և Կ. Պոլսի Տիեզերական պատրիարքության ներկայացուցիչ տ. Էմիլիանոս Տիմոփեյսի միտրոպոլիտը փոխանակեցին ճառեր:

Նույն օրը, ժամը 14.30-ին, համաօրթոդոքս խորհրդակցության մասնակիցների պատվին Վեհաբանում Հայոց Հայրապետի կողմից տրվեց ողջերթի ճաշկերույթ, որ փոխանակվեցին սրտագին, ջերմ ճառեր:

Սույն ընդունելությանը ներկա էր նաև ՀՍՍՀ Մինիստրների սովետին

առընթեր հայ եկեղեցու գործերի խորհրդի նախագահն պրն. Սարգիս Գասպարյանը, որը ողջունեց Սովետական Հայաստանում ներկայությունը օրթոդոքս եկեղեցիների հարգարժան ներկայացուցիչների, որոնք աշխատում են ժողովուրդների մերձեցման, փոխըմբռնման և աշխարհի խաղաղության համար:

Մայր Աթոռում գտնվելու օրերին հյուրերը այցելեցին Մայր տաճարի թանգարան, Վաղարշապատի պատմական վանքերը, եղան Գառնիում, ս. Գեղարդ վանքում, այցելեցին մայրաքաղաքի տեսարժան վայրերը, Ծիծեռնակաբերդում ծաղկեսակ զետեղեցին և հոգեհանգստյան էկումենիկ աղոթքով հարգեցին հիշատակը հայ նահատակների:

Սեպտեմբերի 23-ին, երեքշաբթի օրը, համաօրթոդոքս խորհրդակցության ներկայացուցիչները հրաժեշտ տվեցին Հայոց Հայրապետին և Մայր Աթոռին ու մեկնեցին լավագույն տպավորություններով:

ԴԻՎԱՆ ՄԱՅՐ ԱԹՈՐԻ

Մայր Աթոռ ս. Էջմիածին,  
22-ը սեպտեմբերի 1975 թ.

